

天台藏

大般涅槃經疏

第四冊

湛然寺

印行

款次甲子年菊月敬刊

第四册

大般涅槃經疏會本

板存四川成龍文殊院

大般涅槃經疏

第 四 冊

印行者 湛然寺

地址：台南市忠義路二段38巷8號
電話：(06)二二二八五一八
郵撥：〇〇三四二三〇——聖禾帳戶

承印：祥光彩色製版社
地址：台南市東豐路53巷31號
電話：(06)二三七二五七三
二三七八三六六

中華民國八十八年一月依普門會性老法師所藏木版原書影印一千部
佛曆三〇一八年

大般涅槃經疏會本目錄 第四冊

經 卷次	疏 卷次	會本 卷次	北 本 品 目	南 本 品 目	頁次
廿六	廿三	三十一	光明徧照高貴德王菩薩品第十之六	德王品之六	2561
廿七	廿四	三十二	師子吼菩薩品第十一之一	師子吼品之一上	2663
廿八	廿五	三十三	師子吼菩薩品第十一之二	師子吼品之一下	2759
廿九	廿六	三十四	師子吼菩薩品第十一之三	師子吼品之二	2857
三十	廿六	三十五	師子吼菩薩品第十一之四	師子吼品之三	2945
三十一	廿七	三十六	師子吼菩薩品第十一之五	師子吼品之四	3047
三十二	廿七	三十七	師子吼菩薩品第十一之六	師子吼品之五	3145
三十三	廿八	三十八	師子吼菩薩品第十一之七	師子吼品之六	3243
三十四	廿九	三十九	迦葉菩薩品第十二之一	迦葉品之一	3279
三十五	廿九	四十	迦葉菩薩品第十二之二	迦葉品之二	3343
三十五	廿九	四十	迦葉菩薩品第十二之三	迦葉品之三	3437

大般涅槃經疏會本卷二十六之一第三十一

北涼天竺三藏 曇無讖 奉 詔譯

隋 章安頂法 師 撰

唐 天台沙門 湛然 再治

清 天台晚學 先照 分會

光明徧照高貴德王菩薩品第十之六

德王品之六

第八功德中。文爲三。謂標釋結釋中正明德文竟

○從爾時光明去。第二論義者。前第八章心解脫

文有三。先問。次答。初中三。一就本無奪難。二就本

有縱難。三就不定難。皆令縛解。初文又一。先領旨仰非。二正問。初文者。

爾時光明徧照高貴德王。菩薩摩訶薩言。世尊。如佛所說。心解脫者。是義不然。

○從何以故去。第二正問中意者。若心本有煩惱。此亦不可。若無煩惱。此亦不可。定有煩惱。此亦不可。定無煩惱。此亦不可。就初立本無難中。有九世尊。爲三意。初一雙明心無縛無脫。二有五徧明無縛。三有三徧明無脫。初文者。

何以故。心本無繫。所以者何。是心本性。不爲貪欲。瞋

悲愚癡諸結所繫。若本無繫。云何而言。心善解脫。

初文正難。無縛無脫。如文可了。

○從世尊若心去。第二有五世尊中。偏明無縛又二。前四明無所縛。後一明無能縛。各舉譬顯。今初。世尊。若心本性。不爲貪結之所繫者。何等因緣而能得繫。如人擎角。本無乳相。雖加功力。乳無由出。擎乳之者。不得如是。加功雖少。乳則多出。心亦如是。本無貪者。今云何有。若本無貪。後方有者。諸佛菩薩本無貪相。今悉應有。

世尊。譬如石女。本無子相。雖加功力。無量因緣。子不

可得。心亦如是。本無貪相。雖造眾緣。貪無由生。

世尊。如鑽溼木。火不可得。心亦如是。雖復鑽求。貪不可得。云何貪結能繫於心。

世尊。譬如壓沙油。不可得。心亦如是。雖復壓之。貪不可得。當知貪心。二理各異。設復有之。何能汙心。

二從譬如安櫛去。是後一明無能縛者。

世尊。譬如有人。安櫛於空。終不得住。安貪於心。亦復如是。種種因緣。不能令貪繫縛於心。

舉安櫛譬木。卓空中無因倚住。云二五無縛竟。

○從世尊若心下。第三有三者偏明無解。文爲三。

初明無解。二明無得解者。三明無得解道。一三者。世尊。若心無貪名解脫者。諸佛菩薩。何故不拔虛空中刺。

世尊。過去世心。不名解脫。未來世心。亦無解脫。現在世心。不與道共。何等世心。名得解脫。

世尊。如過去燈。不能滅暗。未來世燈。亦不滅暗。現在世燈。復不滅暗。何以故。明之與暗。二不並故。心亦如是。云何而言。心得解脫。

偏明無解。如文可了。問難中三。一就本無奪難竟。○從世尊貪亦是有去。第二據本有作縱難。問又

二意。一明若本有者。應善心中有貪。二明應前境中有貪。初中又二。先法說。次譬說。初文者。

世尊。貪亦是有。若貪無者。見女相時。不應生貪。若因女相而得生者。當知是貪真實而有。以有貪故。墮三惡道。

法說中意者。若言心本有貪。是亦不可。本有則不從因緣。既借他色而生貪者。當知非有。又心本有貪。不可令無。應不得脫。心應常貪。

○從譬如有人去。第二譬說。有三譬。各有合文。

世尊。譬如有人。見畫女像。亦復生貪。以生貪故。得種

種罪。若本無貪。云何見畫而生於貪。若心無貪。云何如來說言菩薩心得解脫。若心有貪。云何見相。然後方生。不見相者。則不生也。我今現見有惡果報。當知有貪。瞋恚愚癡。亦復如是。

二從譬如眾生去。是縱難中。第二譬合者。

世尊。譬如眾生有身無我。而諸凡夫。橫計我想。雖有我想。不墮三惡。云何貪者。於無女相。而起女想。墮三惡道。

三從譬如鑽木去。是第三譬說合文者。

世尊。譬如鑽木。而生於火。然是火性。眾緣中無。以何

因緣而得生耶。世尊。貪亦如是。色中無貪。香味觸法。亦復無貪。云何於色香味觸法。生於貪耶。若眾緣中。悉無貪者。云何眾生獨生於貪。諸佛菩薩而不生耶。

此中以境對心。亦如是難。問難三。一本有縱難竟。○從世尊心亦不定去。第三據不定作難。文爲三。初明心不定。二明貪不定。三貪及境俱不定。今初世尊。心亦不定。若心定者。無有貪欲。瞋恚愚癡。若不定者。云何而言。心得解脫。

二從貪亦不定去。是明貪不定者。

貪亦不定。若不定者。云何因之。生三惡趣。

三從貪者境界去。是明貪及境亦俱不定者。

貪者境界。二俱不定。何以故。俱緣一色。或生於貪。或生於瞋。或生愚癡。是故貪者。及與境界。二俱不定。若俱不定。何故如來。說言菩薩。修大涅槃。心得解脫。

第二論義。前第八章。心解脫爲二。第一問三難竟。○從爾時世尊去。第二佛答。有云卽次第答前問。卽爲三。初答本無之問。二答本有之問。三答不定。又謂不然。次第安處。似相主對。亦觀文意。全不相關。但隨義勢爲三。先據正義。第二破執。第三廣辨。

因緣中道。初文者。

爾時世尊。告光明徧照高貴德王。菩薩摩訶薩言。善哉善哉。善男子。心亦不爲貪結所繫。亦非不繫。非是解脫。非不解脫。非有。非無。非現在。非過去。非未來。何以故。善男子。一切諸法。無自性故。

此卽第一明心體。非有非無。非心非不心。非貪非不貪。事事雙非兩捨。寧非中道正義。

○從有諸外道去。第二破於定執。又二。先破計有。二破執無。汝若謂心定有貪。定無貪。則同尼乾。初文又二。先廣出所計。二結過訶之。初文者。

善男子。有諸外道。作如是言。因緣和合。則有果生。若眾緣中。本無生性。而能生者。虛空不生。亦應生果。虛空不生。非是因故。以眾緣中。本有果性。是故合集而得生果。所以者何。如提婆達。欲造牆壁。則取泥土。不取采色。欲造畫像。則集采色。不取草木。作衣取縷。不取泥木。作舍取泥。不取縷綻。以人取故。當知是中。各能生果。以生果故。當知因中。必先有性。若無性者。一物之中。應當出生。一切諸物。若是可取。可作。可出。當知是中。必先有果。若無果者。人則不取。不作。不出。唯有虛空。無取。無作。故能出生。一切萬物。以有因故。

如尼拘陀子。生尼拘陀樹。乳有醍醐。縷中有布。泥中有瓶。

二從一切凡夫去。是結過訶之者。

善男子。一切凡夫。無明所盲。作是定說。色有著義。心有貪性。復言凡夫。心有貪性。亦解脫性。遇貪因緣。心則生貪。若遇解脫。心則解脫。雖作此說。是義不然。

已上如文可了。第二破定執中二。先破計有竟。

○從有諸凡夫去。第二破其執無又二。先出所執。二訶責結過。初文者。

有諸凡夫。復作是言。一切因中。悉無有果。因有二種。

一者微細。二者麤大。細卽是常。麤則無常。從微細因轉成粗因。從此粗因轉復成果。粗無常故。果亦無常。善男子。有諸凡夫。復作是言。心亦無因。貪亦無因。以時節故。則生貪心。

○從如是等輩去。第二正是訶責結過。文爲二。先法說。二譬說。初文者。

如是等輩。以不能知心因緣故。輪迴六趣。具受生死。○從譬如枷犬去。第二譬說中。二。初一譬不離有。二次譬不脫無。各有合文。初一譬合者。

善男子。譬如枷犬。繫之於柱。終日繞柱。不能得離。